

# *KA TUMELO, MOSHE*

Kea u leboha, Moena Neville. Malume, batho ba hesō. Ho hotle ho kena tabernakeleng ena kajeno. 'Me ka hopola haeba nka rerisa Moena Neville hoseng hona, 'na nka leka bosiung bona. 'Me eaba ke hlahloba thuto ea sekolo sa Sontaha ea hoseng hona. Le seo e . . . Ha Morena a ratile, re tla leka ho—ho tšoara thuto ena ea sekolo sa Sontaha.

2 Joale, e se e le liveke tse peli joale, nka rialo, ke kene kahare. 'Me e sa le ke khathatsehile kamoo le utloisisitseng, hoo, masimong, ke hlile, ka hla ka khathala 'me ke sa khone ho tsoelapele. 'Me ka tlameha ho kena ho phomola feela nakoana. Eaba ke theohela Wolf Creek Dam matsatsi a ka bang mararo, tlase Kentucky, moo ke hlahetseng. Ka nahana, "Oh, hona joale ke ikutloa ke thabile feela. Ke monate."

3 'Me ha ke fihla hae, nthoana ea pele e khahlaneng le 'na lifahleho li talimane e le tseko ea lekhetho la 'muso. Ka boela ka sithabela botebong hape. Ka lemoha hoba ke tla hloka ho fetang veke kapa tse peli ho phomola.

4 'Me tšebetso ea ka e mathuleng a ho fetoha joale. 'Me ha kea hlophisa likopano tsa letho. 'Me ke ka baka leo ke batlang ke khelohetse kathoko, le ho hopola, 'me joale livekeng tse peli tse tlang, ke tla phomola feela, phomolo e shoetseng, le ho emela Morena.

5 'Me boholo ba lōna batho ba ka mona, mekaubere, ba hlotseg le rōna halelele hakana, le hopola seo Morena a re boleletseng sona, e sa le A phethisa seo A boletseng A tla se etsa.

6 Le hopole, hona tšimolohong, ka har'a kereke mona, hoseng mohla re hlomang lejoe a tabernakele, kamoo A . . . E ngotsoe, e manehiloe lejoeng, lehlakung la Bibele ea ka. Hoseng hoo, pono e khōlō eo, ho itsoe, "Ena ha se tabernakele ea hao."

7 Ka re, "E ho kae, Morena?" 'Me eaba O mpea ka ntle tlas'a leholimō. 'Me Puo ea utloahatsoa. 'Me ka sheba 'me ka bona lifapano tse tharō tseo, tse kang, lifate tse hlahleng tholoana, le tse joalo. Le tseba seo pono eo. E sa le e ngotsoe, lilemo.

8 Ho thonaka, tsatsi le leng, buka ea khale holimo mono, ho bala tse ling tsa lintho tseo Morena a li boletseng, a li lepileng; li se li hlahile. Ka linthoana tsena, le ka moo ntoa e tla hlaha, 'me lintho tseo li otlile phuoana.

9 Ho setse lintho tse peli feela, liporofetong tse khōlō tseo. Eona, ke makoloi a mathisoang tseleng ke remoutu, li tšoana le lehe, feela ha u e khanne. E a itaola. 'Me ho ntano hlaha mosali e moholo, ehlide Amerika ke sechaba sa mosali. 'Me e tla . . . Ho tla hlaha mosali e moholo, e be Mopresidente kapa ntho e kang eo,

sechabeng. 'Me ho nto fihla tšenyeho e shoetseng. Sechaba sohle se tla falatsoa.

<sup>10</sup> 'Me, hoo, kea lepa . . . Joale ha se Morena ea buang sena. (E 'ngoe, mabapi le mosali, e joalo, ke Morena.) Empa ka lepa, ka 1933, ho re lefatše le tla timeletsoa ka botlalo pele ho '77.

<sup>11</sup> Ka hona, mohlang oo ha kea tseba ba sibolotse ntho e ka le timeletsang e joaloka eo ba e tšoereng hona joale, empa ke bone sechaba se falalitsoe ka ho shoeletseng, e le likutu tsa lifate feela le lintho tse kang tseo, tse setseng.

<sup>12</sup> Ka hona, e mothating oa ho etsahala. 'Me haeba lintho tse ling tsena li hlahile joalo ka ha A boletse, ho tla ba joalo hape; le joalo ka ha A boletse Lengolong mona, seo A se bolelang. Haeba Kreste a tlie khetlo la pele, O tla tla khetlo labobel. Le lintho tsohle tseo A li boletseng li tla etsahala. 'Me ka ho bona sena, le ho tseba re . . . palo ea rōna e se e tla bitsoa, joalo ka sechaba, ho tseba Kereke e le mathuleng a ho nka Hloibilo ea Eona. E sisinya pelō ea moreri, kapa ea mophuthehoana ofe, ho itseba re le letsatsing lena le nakong eo re phelang ho eona. Ke nako e khōlō ka ho fetisa eo motho ofe a kileng a phela ho eona lefatšeng, ke hona joale; ke ho re, ka nqa ea Kereke. Ka hona, ruri ke lakatsa lithapelo tsa lōna.

<sup>13</sup> 'Me ke bone ka har'a tabernakele, 'me ke ba bone . . . ba tlil'o tšoara likhetho tse itseng le ntho e 'ngoe le e 'ngoe, ka kerekeng, tsa lekhotala le itseng le joalo-joalo.

<sup>14</sup> 'Me—'me kereke e hloka kopano e nyenyane, phuluho e nyenyane. 'Me le bile mosa ho 'na ka mehla, le ho ntphonolofatsa. 'Me boteng ba ka mona, bo bonahala ebile lehlohonolo ho lōna. 'Me ke tiile, ho ba le lōna, ebile leseho ho 'na. 'Me le amohetse seo ke se buileng e le 'Nete ka mehla, kamoo ke se boneng ho Molimo. 'Me ke—ke ananela seo.

<sup>15</sup> Ka hona, ke ile ka qala, 'me ka lokela ho fumana, ho hlekha kereke ea rōna, makhotla a eona, le likhetho le lintho tse joalo hape. 'Me hape—hape, ka nahana, ka mora moo, ke tla ea phomola nakoana pele ke khutlela tšimong.

<sup>16</sup> Joale ena e be taba ea lōna. Joale, ha e a rereloa ba kantle. E retersetoe tabernakele ena. Re batla kopano ea tabernakele ena, e le ho re ntho efe le efe, le phoso efe le efe, lintho tsohle tse neng li etsahala, e ka bang maikutlonyana e mong ho isa ho e mong; lintho tseo, ke tla tšoarana le e 'ngoe le 'ngoe ea tsona 'me ke li shebe lifahleho li talimane. Ka hona haeba u sa batle ho tobana le eona, u mpe u tsoe naheng; hoba u tlil'o tobana le karoloana ka 'ngoe ea eona lifahleho li talimane, ka tloaelo ea rōna ea mehleng mona tabernakeleng. 'Me ho ntano batalatsoa ntho eohle, hobane re baena le likhaiseli tse ngoathileng selallo 'moho, 'Mele oa Kreste, tafoleng ea lihlohonolofatso. 'Me ke diabolosi feela ea ka fehlang ntho efe e phoso, ho fuluo maikutlo, kapa ho pshatla, kapa ntho efe e joalo. 'Me ke tla nka Moena Neville oa rōna, re

tla tloha tulong e 'ngoe ho ea tulong e 'ngoe, ho teanya batho le batho, 'moho, ho fihlela tabernakele ea khale e khutlile, e boetse e theiloe, e eme ka maoto a eona, ho ntšeletsa 'Muso oa Molimo. Joale, tabeng ena, lebaka leo ke buileng sena, ke hobane re phuthehile re le seholtošaana sa rōna mona hoseng hona.

<sup>17</sup> 'Me joale ke mothating oa ho ea phomola nakoana, le ho khutla ka potlako ea bokhoni ba ka. Ke shebeletse ho tloha ho kena tšimong hape. 'Nakong ena, ha Morena a ratile, ke batla ho inola lethonyana leo re le phuthileng matloleng, le joalo-joalo, 'na ka sebele, ke tsoela ka ntle ho . . . lenaneong lena la boromuo ba linaha lisele. Le ho ipatlela tente e ncha, le ho lisebelisoa tse itseng tse ncha, le ho qalisa tšimong. Ha se ho tloha kerekeng ho ea kerekeng, empa ho kenela likopano tsena tsa rōna.

<sup>18</sup> Joale, ha se ho hlokomołoha seo baena besō ba 'memileng, ke ntho e babatsehang. Empa khafetsa, u fumana libokeng tsena, ba u tlaleha u tla fiila mono, 'me ho fihle metsoalle ea lōna eohle, 'me ho qeloa chelete haholo. Ho tlhotloa batho bao feela. Ke qala ke lemoha taba eo, lea bona. Ka hona seo—seo ha se a loka. Re batla ho fumana tulo ho ba phuthela teng. Ha lea tlameha ho tlisa chelete ea lōna. Ke ho tla feela, ka bo-uena, le—le ho sebeletsa Morena. Lea bona? 'Me ka hona joale . . .

<sup>19</sup> 'Me hona joale bosebeletsi ba ka bo a fetoha. Le sa hopola mehleng ha ke sa tšoara letsoho la motho, le ho ema mono feela, ebe Morena o mpolella mathata a bona. Ha thoe, "Ho tla isa-isā, u tla tseba lona lekunutu la pelō ea batho." Mang le mang oa lōna o e tseba e etsahetse kamoo E boletseng. Joale lena ke lekheto le hlahlamang, ke taba e porofetiloeng le e lepiloeng e sa le pele, ke taba e tla fetisa ntho efe ea Eona, lea bona. 'Me hona joale ke phetoho.

<sup>20</sup> Ka lona lebaka leo Satane o ntoantša ka lekhetho, ho leka ho mpolella, eēna goromente, ho thoe ke molato oa lekhetho la peni e 'ngoe le 'ngoe eo ke e phuthileng, joalo ka moreri, ho qala lilemong tse mashome a mabeli a metso e supileng tse fetileng, ke kene tšebeatsong. Ha ho joalo, hobane e fetile kerekeng mona.

<sup>21</sup> Ke 'na teraseti ea kereke ena. Ke hantle haholo. Ke taba e ngotsoeng mona. Ka hona, hape, haeba ke teraseti-ramatlotlo oa kereke ena, ha ho letho lefatšeng . . . Goromente ha a amane le eona ka letho. Ha ba botse kereke. Ba botsa 'na joalo ka ramatlotlo oa kereke. 'Me literaseti li tekenile pampiri e bolokiloeng koana bankeng, moo matlole 'ohle a ka . . . Sebakeng sa ho ithehela motheo oa ka, ke e fetisitse kerekeng ea ka mona, hoba ehlike ke motheo, le hona.

<sup>22</sup> 'Me ketso eo, e nthibela ho tèla kereke le ho e hloboha, le ho tsoela ka ntle 'me ke sa amane le eona ka letho mona. Ka mora ho tšepisa batho ho khutlela kerekeng, nako ka morao ho nako, le ho ba thusa. Ke ile ka e baballa joalo, hobane ke tšepisitse lōna batho ting. Ke ka lebaka leo ke e tiisetsang, sebakeng sa ho

hloma motho a le mong. Hape, haeba u e sebetsa joalo, e fetoha mokhatlo. 'Me ke finne selelu khahlano le mokhatlo. Ka hona ke—ke tla e baballa joalo, e le matsohong a Molimo, re tle re ntšeletse 'Muso oa Molimo.

<sup>23</sup> Joale, hoseng hona, re batla ho hlahloba Lentsoe lena la khale le bokoang, le ho lumela.

<sup>24</sup> Joale, ke batla ho bolela, hape... Ke bona Moena Egan le bongata, le literaseti tse ling tse lutseng mona, hoba re lule 'mokeng oa teraseti, bosiusing bo bong; ke 'nete, ka pel'a kereke, ho re e mong le e mong oa lōna ha le sa le e—e literaseti tse hloailoeng. Lōna le literaseti tse khethiloeng, 'me mabitso a lōna a libukeng. Ho lokile.

<sup>25</sup> 'Me joale ba tla tšoara likhetho tse ling tsa—tsa batikone, le ba joalo. 'Me Moena Neville, o tla ba mema hang ka mora tšebeletso ena, ke hantle, le bakeng sa ramatlotlo le ba joalo, re sa ntse re hleka kereke. Ho hlophisa, metheo eohle, ho e lokisa, ebe moo re ka tšoara tsoselotso ha e tla.

<sup>26</sup> Joale, pejana re phetla mahlaku mona, thutong ea sekolo sa rōna sa Sontaha, Lentsoeng le leholo lena la Molimo o phelang, ha re inamiseng lihlooho tsa rōna feela, nakoana feela, re sa buisana le Mothei oa Buka ena. 'Me joale le lahle mohopoloo fe le ofe, sohle se khahlano, se u thibelang ho fuoa lehlohonolo.

Ha re rape leng.

<sup>27</sup> Molimo o halelalang le o lokileng ka ho fetisa, re kena ka pel'a Sefahleho sa Hao se tlottlehileng joale, re U nyehela maphelo a rōna, le lisoule tsa rōna—tsa rōna, le mebele ea rōna, le litšebetso tsa rōna, le litalenta tsa rōna. 'Me sohle seo re se ruileng, re U nyehela sona. 'Me ha U re talima, Morena, haeba sebe se le teng se hlobotseng le se sa boleloang, rea U kōpa, oho Morena Molimo, ho tšasa Mali a Mora oa Hao, Jesu, nqalong e joalo. Hoba, re itemoha khaello ea rōna, 'me re ke ke ra ikhona le ka mohla. Re mpa re itšepisa ka ho shoella Maling a Hae a theko e thata, le mohau oa Hae ho lefella molato oa rōna, hore rōna baetsalibe ba se nang tokelo re tle re kene tsatsi le leng ka sebete ka pel'a Sefahleho sa Hao, re tšoere ka pel'a rōna Mali ana a Morena Jesu. Etsoe, Uena, mehleng e fetileng, u a hlomphile e le Mali a Mora oa Hao ea tsoetsoeng a inotši, le ho tšepisa, ho re, "Ka Eèna, ha re ipolela libe, re tla beoa ba lokileng ka mohau oa Hae."

<sup>28</sup> 'Me joale re kōpa, Morena, hore U tšoarele phoso efe ea rōna, sebe sefe sa tlolo kapa ho thella, bokhopo, haeba bobo bofe bo hlabile soule ea rōna, ka metsu e tukang ea diabolosi, U tle u leleke sera se khopo sena sa Hao, le sa batho ba Hao.

<sup>29</sup> 'Me re U kōpa ho romela Moea o Halalelang ho tšoara Lentsoe nakong ea joale, re sa ineela ho ba lisebelisoa, U tle u bue ka rōna, ho utloa ka rōna, Lentsoe la Hao. 'Me rōna re boele re Le amohele e ka hojane le tsoa ho Uena, 'me re tlohe tulong

ena, kajeno, re ikutloa re boetse re teiloe bocha nqa tšebetso ea Kreste; re tle re lokele tšebetso ea bosiung bona le hosane, ka baka la ketelo ea Moea o Halalelang.

<sup>30</sup> Hlohonolofatsa baena besō hohle, likereke tse bophareng ba lefatše, tse kakatletseng Lentsoe la Bophelo letsatsing le lebe lena. Re utloa ho sa sala nako e kaalo ho sebetsa, hobane bosiu bo tšoara ka potlako. Maru a ntoa a boela fefoha. Bobe bo haufi, 'me re U kōpa ho re lumella ho sebetsa ho feta pele. Khatholla mebele ea rōna e khathetseng, Morena, le ho boela u re nehela ntoeng. Hoba re e kōpa ka Lebitso la Morena Jesu, 'me re rapela ka baka la Hae. Amen.

<sup>31</sup> Ha re phetla, hoseng hona, Bibeleng, koana—koana khaolong ea 11 ea Buka ea Baheberu.

<sup>32</sup> Laborarō bosiu re buile ka khaolo ea 7 ea Buka ea Baheberu, ka "Melkisedeke, ea se nang ntate, le ea se nang 'mè, ea se nang qalo ea litšiu, kapa qetello ea bophelo."

<sup>33</sup> 'Me ke ile ka hopola, ha ho ka etsoa, hoseng hona, ho ka tšoaneleha hape ho phetla Buka e babatsehang ena, haele moo re se re hahile metheo holim'a seo re batlang ho se bua, lipalong tse fetileng. 'Me re tlola khaolo ea 10, le khaolo ea 9, e buang ka melao ea mahlabelo, re tla kena tabeng ea "tumelo." 'Me mona Bukeng ea Baheberu, khaolo ea 11, le ho qala ka temana ea 23, re Le bala tjena:

*Ka tumelo Moshe, hobane a tsoaloe, o kile a patoa ke baholo ba hae ka likhoeli tse tharō, ha ba 'mona hoba ke ngoana e motte; 'me ha ba ka ba tšoha molao oa morena.*

*Ka tumelo Moshe, ha a se a hōla, o hanne ho bitsoa mora oa morali oa Faro;*

*A mpa a ikhethela hona ho tšoenngoa le sechaba sa Molimo, e seng ho thabela menate ea sebe se felang kapele;*

*A kholoa hoba sekhobo sa Kreste ke monono o fetang matlotlo a Egepeta: . . . 'me o be a talimile nqa moputso.*

*Ka tumelo o kile a tloha Egepeta, a sa tšabe bohale ba morena: kahobane a na a tiea, joalo ka hoja a bona ea sa bonahaleng.*

<sup>34</sup> Ke batla ho qotsa therō, hoseng hona, "ho khetha ka tumelo." 'Me ke batla ho nka sehlooho, mantsoeng a mararō a pele a khaolo ea 23, "Ka Tumelo, Moshe." Le, "ho khetha ka tumelo," e batla e le sohle seo re se etsang, re loketse ho khetha ka tumelo. 'Me re fumana sohle seo Moshe a se entseng, taba eo e lokela ho phethoa, e ne e le ka tumelo; e seng ka pono, empa ka tumelo.

<sup>35</sup> 'Me lebaka la ho khetha ha ka hoseng hona, bakeng sa kereke e maemong ana, ebile hobane ka har'a tsa rōna. . . . esita le likolong tsa rōna, le ka mathoko, esale re rutiloe haholo ka mahlale. Ka baka la sena, re huletse batho hole le tumelo. Joale,

tumelo ha e pakoe ka mahlale a saense. Tumelo ke seo mahlale a saense a sa se boneng. 'Me re... Haeba re ka lahleheloa ke tumelo e khōlō ena, re lefifing ka botlalo, eona... ho sa tsotelehe bokhabane ba ho ruteha ha rōna, kamoo re khonneng ho hhalosa Lentsoe la Molimo, ho nyallana le tsela ea bolumeli ba rōna.

<sup>36</sup> Ha ho tsela ea ho khahlisa Molimo le ka mohla, haese ka tumelo e inotši. Lengolo le e beha joalo e hlakile, 'me ke ka tumelo. "Me ha tumelo e le sieo," Lengolo le rialo, "ha ho kamoo Molimo o ka khahlisoang kateng."

<sup>37</sup> Ka hona, haeba tumelo e sa lumellane le mahlale a saense, 'me mahlale a saense a hanana le tumelo, tse peli li—li hlile lia rorehana, ke moo re tlamehang ho khetha joalo ka Moshe ha a entse. Ka tumelo rea lumela!

<sup>38</sup> Joale, haeba re lahla tumelo, ha ho thapelo ea rōna e ka arabeloang ke Molimo le ka mohla. "Hoba ea tlang ho Molimo o tšoanetse ho lumela pele hobane O teng, le hoba ke moputsi oa ba O batlang ka ho loka." Ka hona, ha re lahleheloa ke tumelo, lithapelo tsa rōna ha li phumutsoe; ha re tsoe tema ea letho.

<sup>39</sup> Ke phetho seo re ka se nahanang, hoseng hona, ke ho tiisa tumelo. Hape, ha re timelloa ke tumelo, litšepo tsohle tsa rōna li timile. 'Me ha re lahla tumelo, bonneta bohole ba rōna ba semoea bo timile. Hoba, u ke ke ua tsetleha tumelo linthong tseo u li bonang, hoba lintho tseo u li bonang li senyeha tsohle.

<sup>40</sup> Ha re shalima motho ea itseng oa motonana, moreri e moholo, kapa phutheho e khōlō, li tla timela tsohle, tsatsi le leng. 'Me ha re sheba sechaba se seholo, kapa sehlomo se seholo, li tla timela tsohle, tsatsi le leng. 'Me hape re tšoanelo ho phela ka tumelo, ea lintho tseo mahlale a saense a sa li tlaleheng. Re lumela ka tumelo.

<sup>41</sup> Joale, re lahleheloa ke khanya ea rōna ha re lahleheloa ke tumelo. Joale, ha re sutha tumelong, re sotetsa kereke selikalikoeng sa hlalefo.

<sup>42</sup> 'Me khafetsa, ba hopotsa, har'a batho, e re ka ha phutheho e le tonana, 'me ba theile likereke tsa litonana, līlkorlo tse phahameng, le batho ba bangata, ba baholo ba apereng hantle 'me ba borosotsoe, ka matsebetsebe a lichelete, ba khona ho reka ntho e joalo, rōna, hangata, re e hopotsa e susumetsa, ho thoe kereke e ikhethang ena e tlamehile e be e bululetsoe. Kapa, ke khafetsa re lebisa ho bareri ba fapaneng ba tsoang ba kena temeng 'me ba hula matšoel a maholo, e be rea nahana, ka linako tse ling, ho thoe ke lipontšo tsa pululelo. Empa ruri ha se 'nete e shoetseng. Eo ke pululelo ea motho.

<sup>43</sup> Empa pululelo ea makoma e tlisoa ke ho phethisa thato ea Molimo. Lea bona? E bang a le mong, kapa ba tlalang seatla. E leng kereke ea tonana, kapa kereke e nyenyane, ha se lebaka. E ka ba sebui se phahameng, sa kheleke, kapa monna feela ea batlang a sa tsebe li-ABC tsa hae, ha se lebaka. E itšetlehile ka molaetsa a

o tlisang, haeba o bululetsoe ke Lentsoe la Molimo, kapa, na ebe o bululetsoe ke likakanyo le lithahasello tsa motho?

<sup>44</sup> Batho ba bang ba ka susumetsoa ke sebui sa kheleke. Ha e nèpahatse taba ka letho. Ka linako tse ling ba susumetsoa ka ha monna a koetlisitsoe hoo a khonang ho tlisa ntlha ea hae. Ha e bolele hoba ke taba ea Molimo. Lea bona?

<sup>45</sup> Re ka bululeloa feela, ke Lentsoe la Molimo, le bokoang la Bosafeleng, 'me eona e abjoa ke Moea o Halalelang. Re e fuoa ka tumelo.

<sup>46</sup> Joale re ka nahana ka Moshe, le ka nako e khòlò ena bophelong ba hae. 'Me re boela re bala, tsa tsoalo ea hae, ka paballoon ea Molimo, empa bophelong ba Moshe ho fihla moo nako ea ho khetha e leng tlameho. Haeba re ka bala bosius bona, re mo fumana e le mora oa morali oa Faro, 'me e le mojalefa oa terone, 'me e tla ba mohlahlami oa Faro Egepeta. E ka ba o qamakile a sheba, hoba a fihle lilemong le boikarabelong, 'me ho be le makhoba ao a sebetsang mekoting ea seretse. 'Me Moshe, a sheba ka difesetere tsa paleisi, ho shalima 'ona makhoba ao Faro a shalimmeng, empa shalimo eo keha e fapane hakakang.

<sup>47</sup> Ke batla ho haha motheo oo, hoseng hona, metsots e 'maloa, 'me Molimo oa Leholimō a e khokhothele pelōng e 'ngoe le e 'ngoe mona. Mokhoa oa ho shalima ntho, o etsa phapang ho uena.

<sup>48</sup> 'Moleli e moholo, John Sprawl, mosokolloa oa bosebeletsi ba Moena Bosworth, boholo ba lōna le hopola khale lilemong tse fetileng, tsa Old Glory Barn. O boletse, tsatsi le eng a kene leetong, pele molekane le mohatsa'e ea ratoang a hlokahala. Ba ne ba le La Salle, Lorraine, Fora. 'Me nkile ka fuoa monyetla oa ho etela tulo eo. 'Me lesupatsela la ba tsamaisa lirapeng, le ba bontša linthoana tse fapaneng. Eaba ba oelana le seemahale sa mofuta sa Morena Jesu, thakhiso. 'Me Mongh. Sprawl a eme hojana, a se bohile, eèna le mohatsa'e, 'me, lipelōng tsa bona, ba nyatsa mohopolo oa setaki, kapa 'metlatšoantšo, ke rialo, mohla a se khephotseng lejoeng, ntho e nyarosang hakaalo ho bapisa mahlomola le lerato le khauho ea Morena Jesu, le kamoo se shebahlang e selo se otlakiloeng se remiloeng. Eaba lesupatsela le atamela Mongh. Sprawl, la re, "Monghali, kea kholoa o nyatsa seemahale sena sa Morena Jesu."

'Me a re, "Ehlile bo."

<sup>49</sup> 'Me a re, "Ha kea makala, hoba batho ba se shalimang, khetlo la pele, ba se nyatsa."

<sup>50</sup> 'Me Mongh. Sprawl a re, "Khele, ha ke bone khauho kapa tšusumetso ha ke sheba selō se joalo, ke ipotsa sepheo sa 'metlatšoantšo ho se betla tjena."

<sup>51</sup> "'Me 'metlatšoantšo . . ." Sa re, "Mongh. Sprawl, sefika sena se itoketse, 'metlatšoantšo o ne a hopotse hantle. Empa bothata ba hao, ke bona. Ke kamoo u se shalimileng kateng." Eaba o ba

tšoara eèna le mohatsa'e ka letsoho, a ba theolela aletareng e maotong a sefapano sena se boletsoeng. 'Me a re, "Joale, Mongh. Sprawl, sheba holimo joale." Eitse ha a sheba holimo, a re pelō ea hae ea batla e ema. Phapang e kaalo, ho ema hojana mono le ho se *sheba* joalo, le ho theohela fatše ho se shalima ka moo se betletsoeng ho shejоа.

<sup>52</sup> 'Me le Molimo o joalo. Tumelo e joalo. E itšetlehile ka chalimo ea hao. Haeba u e sheba ka Bibele e itseng ea histori, selō sa matsatsi a fetileng, u ke ke ua fola molemo oa Bibele. U tlameha ho itihela mangoleng a hao, le ho mamela melao ea Bibele ena, le ho E shalima ka mahlo a Moea o Halalelang.

<sup>53</sup> Ke batla ho botsa mokhupi, hoseng hona. Molimo oa histori o re thusa'ng kajeno ha e se Oona Molimo o tšoanang? Molimo o thusa'ng, o nkang Moshe o etsa mehlolo ka eèna, ho tla re thusa'ng ho bala ka Molimo o joalo ha e se Oona kajeno? O thusa'ng Molimo o loetseng seboping sa mollo, bana ba Baheberu, ha e se Molimo Oo kajeno? O thusa'ng Molimo o ka ahlolang o khetholla ba lokileng le bakhopo, letsatsing le fetileng, oa otla batloli oa putsa ba lokileng, ha e se Molimo Oo kajeno? Kereke re e tsamaea ka life? Hobane'ng re ila lintho tsa lefatše, ha E se Molimo oa kahlolo e tšoanang, o fupileng mohopolo oa Oona oa ka mehla? O thusa'ng Molimo o ka amang letsoho la mosali ea befetseng ke feberu, feberu e ntoo khaotsa, haeba E se Molimo oo kajeno? Ho ka thusa'ng ho sebeletsa Molimo o ka bitsang motoolle oa Oona lebitleng, hoba a shoe matsatsi a mane, ha E se Molimo o tšoanang kajeno?

<sup>54</sup> Ka tumelo re lumela A tla re bitsa lefatšeng tsatsi le leng le tlotlehang, le ha re le melorana e tlalang khabana feela. Re ka e kholisa joang? Ha re e kholise. Rea e lumela. Ha re koptjoe ho kholisa letho. Re koptjоа ho lumela.

<sup>55</sup> Ka tumelo Moshe o entse *hore-le-hore*. 'Me Moshe, mehleng e sa le mohlankana, o shebile ka fesetereng ea paleisi, makhoba ao, o bone sona sehlopha sa makhoba a tepeletseng, a litšila, a netiloeng ka tšila a bonoeng ke eèna Faro.

<sup>56</sup> 'Me Faro mohla a ba shebileng, le Baegepeta, e ne e se letho ha e se mphi ea makhoba. Molemo oa bona e le hona hoo; ho fetoloa batho ba lubang seretse, ho lubela metse e hahuoang ke Faro litene tsa seretse. Baegepeta le Bofaro ba ne ba shalimile makhoba joalo.

<sup>57</sup> Empa Moshe, ha a ba sheba, chalimo ea Moshe e ne e fapanе. Mohla a boneng, ba feta fesetereng, lifahleho li khohletse habohloko, likeleli le theoha marameng a bona, 'me mebele ea bona e kobotiloe, o ba shalimme e le batho ba Molimo. Ha a ba shalima e le makhoba. O ba shalimme joalo ka batho ba Molimo ba khethiloeng.

<sup>58</sup> 'Me, oh, ha ke potoloha, ho tloha naheng ho ea naheng, le ho tloha sechabeng ho ea sechabeng, ke rera! Ho tloha ke tsoile

menyakong ea tabernakele e nyenyane ena, e leng motheo o sa khetheng nku ka pere, o se nang molao ha e se lerato, ho se buka ha e se Bibele, 'me ho se tumeloana ha e se Kreste, ke lekile ho sheba bana ba Molimo, le holim'a bakhesuoja, joalo ka batho ba Molimo ba hloauoeng le bakhethoa. Ha ke ba botse haeba e le litho tsa Branham Tabernakele. Ha ke ba botse haeba e le Methodise, kapa haeba e Mapresbeteriene, kapa haeba e le Mapentekosta, kapa Manazarene, kapa Pilgrim Holiness. Ke batla ho ba shalima e le batho ba Molimo feela. 'Me ke bone liketso tsa bona le khato ea bona, e le bahlanka Morena Molimo. 'Me pelō ea ka e lakatsa seqoqo le bona, ho sa tsotelloe tlapiso ea bona. Ke lakatsa seqoqo feela le bona. Ke ba rata ka hobane ke tseba e le batho ba Molimo.

<sup>59</sup> Ha ke bona mosali ea theohang seterata, a apere mose o molelele, moriri oa hae o shobiloe hamonatjana sekotlong, ka—ka mose o motle o hlophehileng; ebe ke bona leleiti le leng le lecha, thaka ea hae mohlomong, le apere paranyana ea lishotso; koana eēna, ka tšobotsi, a feta mosali ea moriri o molelele habeli ka botle, ho latela chebo ea lefatše, empa ke tla emela ngoanana ea apereng joalo ka Mokreste. Leha ba ka iqabola ka eēna, ba mo bitsolla lehlanya, koana, ke tla mo emela. E ka ba ha a motle joalo ka ngoanana e mong, ka tšobotsi, empa o bona ntho e 'ngoe. Ka tumelo o bona Eo Ea sa bonoeng, Ea tataisang bophelo ba hae.

<sup>60</sup> Ha ke bona monna temeng, a bitsoa "modikone," kapa "moreri," kapa "lehlanya," hobane a hana ho tsuba, le ho noa biri, ho ea litantseng, joalo ka ba bang bohle, 'me a bitsoa "lehlanya," pelō ea ka e tsoela monna eo. Ke moena oa ka, tlase leroleng la Egepete, e susumetsa pelō ea rōna ho mo hamarela le ho re, "Moena, re baeti le bafeti, ba lefatše lena, 'me ke lakatsa bolekane ba hao."

Moshe o ne a tlamehe ho etsa khetho, ho ketha ka tumelo.

<sup>61</sup> Ke bahlanka ba ba kae ba ba beng ba ka phamola monyetla oa ho beoa bara ba morali oa Faro! Ke bahlankana ba bakae ba neng ba ka phamola monyetla oa Moshe, ba thabela menate eohle le phatsimo ea lefatše, ho beoa khosi ea Egepete, lefatše la beoa maotong a hae! "Ha se le bothoto boo," bahlankana ba letsatsi la hae ba ka be ba nahanne, "ha Moshe a khethile ho tujoa le ho sotloa le batho ba Molimo."

<sup>62</sup> Hobane'ng a entse joalo? Ka tumelo, eare ha a phahamisa mahlo a hae, o shalimme ka nqane ho phatsimo ea lefatše lena. O shalimme ka nqane ho menyaka ea sebe. 'Me Bible e 'moletse a ile a tiea a shebile Eo Ea bonoeng, ka tumelo, 'me o khethile ho sebeletsa Molimo oo ho sa tsotelehe se hlahileng.

<sup>63</sup> Ha eso fetohe. Bongata ba rōna re ka ea ho seo re se bitsang moaho o motle ho feta. Re ka thabela, koana, bolekane le menate ea ho lula setulong se fetisang. Re ka tuma, ho noa le ho tsuba, le ho apara le ho itšoara selefatše. Empa molato ke'ng? U

phahamisitse mahlo, 'me ka tumelo u bona Eo Ea sa bonoeng, 'me u khethile lehlakore la bakhesuoa le bao ba bitsoang bathethehi-bahalaleli ba letsatsi lena. Hobane ka tumelo re bona Eo Ea sa bonoeng, ho khetha ho oeloa ke lihloriso le mahlomola.

<sup>64</sup> Nke ke ka bolella batho ho khetha ho hlorisoa. Ha ke re u khetho ho tšoenyeha. Ho etsa joalo e tla be se botho. Empa ha hloriso e larile temeng ea tšebetso, joale re e amohele ka moo e tlang. Ha ke batle ha u etsa letho ho tšeihuoa ke motho. Ha ke batle ha u bua lintho tse fapaneng, ho re, "Ke a . . . Ke setho sa kereke e sa lumeleng *hore-le-hore*, lefatšeng," 'me lintho tse kang tseo, feela hore batho ba tle ba u some. Ke uena ea ikhulelang eona. Nke ke ka u bolella ho tsoela ka ntle mona le ho itšoara le ho etsa ntho e hlahafetseng. Ha ke batle ha u etsa joalo, motho a tle u bitsolle lehlanya. Ke uena ea ikhulelang eona holimo. Empa haeba e larile tseleng ea kutlo ea hao nqa Molimo, lefatše le bue seo le batlang ho se bua. Phela u tsoele pele.

Etsa khetho ea hao. Monna le mosali e mong le e mong o tlameha ho etsa sena.

<sup>65</sup> Ho ka thoeng hola Faro a bona seo Moshe a se boneng? O bone matšoenyeho a batho. O tsebile moputso o tlang ho lefshoa. Empa o e khethile ka tumelo, sebakeng sa ho ipatlela menate ea sebe.

<sup>66</sup> Mona e ka ba ho lutse bathoana, maleiti a macha, e leng basali ba khabileng ba khemang le linako. Lefatše le rata ho rialo ho lōna, "Etsa *hore-le-hore*. U motle. 'Mele oa hao o bophehile hantle. U tlameha ho u pepesa."

<sup>67</sup> Empa, khaitseli ea ka, phahamisa mahlo a hao u shebe ka nqane ho nyee eo, ho Eēna ea itseng, "Ke manyala ha mosali a apara seaparo sa monna."

<sup>68</sup> Ha banna e leng batho ba motse oa heno, ha basali ba lemuloana la hao, ba itse, "Kuta moriri o molelele oo. E tla phola ho feta. E tla ba *sena, sane*, kapa se *seng*." Kapa, "E tla u tsoela molemo ho feta." U se ke ua e mamela!

<sup>69</sup> U phahamise mahlo a hao, 'me ka tumelo u bone Ea itseng, "Moriri oa mosali ke khanya ea hae, 'me a se ke a u kuta."

<sup>70</sup> Haeba ba re, "E tla tuma. E tla u emela mosebetsing oa hao, kapa ho mong'a hao, ha u ka noa seno sa boithabiso. Ha u ka tsuba lisakreste joalo ka basali ba bang, u tla nkelloa holimo tikolohong ea heno."

<sup>71</sup> Phahamisa mahlo a hao ka tumelo u shebe ho Eo Ea itseng, "U se ke ua silafatsa 'mele ona, Ke tla o senya." Ka tumelo re lumela lintho tseo. Ha se seo u se boneng. Ke seo u se lumelang. Ka tumelo, Moshe o entse seo.

<sup>72</sup> 'Me leetong lena la tumelo, ho fihla nako ea khetho.

<sup>73</sup> Lota o entse phoso e mahlonoko eo re e etsang. Khafetsa re khetha molemong oa rōna. Re khetha lintho tse tlang ho ba molemo ho feta.

<sup>74</sup> Ka linako tse ling khohlano ha e kena kerekeng, 'me motho o tla re, "Be, modikone kapa molisa o emela lehlakore lena." Se shebe seo. Sheba se lokileng. Ntša ntho eo 'me o hlahise ntho e ba teanyang. E molemo.

<sup>75</sup> Ke eona khetho eo. 'Me re khethela borōna. Re khetha ntho molemong oa rōna.

<sup>76</sup> Empa Moshe o khethile lihloriso le sekhabo, a tle a tsamaee le batho ba Molimo. E nahaneng joale. E utloeng. "Ho khetha lihloriso tsa batho ba Molimo, o li balile e le letlotlo le fetisang ka boholo, hoba a tiea, a bona Eo Ea sa bonahaleng."

Joale, Lota, khetlo le leng, o kile a tlameha ho khetha.

<sup>77</sup> 'Me e ka ba, hoseng hona, mona ho tla lula banna le basali, le tla etsa khetho ea lōna ea ho qetela. Kajeno u seo u leng sona, hoba lilemo tse 'maloa tse fetileng u khethile ho ba seo u leng sona joale. 'Me seo u se khethang joale se tla rala seo u tlang ho ba sona lilemong tse hlano tse tlang ho tloha kajeno. Lilemo tse hlano ho tloha kajeno u ka ba mishinari. Lilemo tse hlano ho tloha kajeno u ka ba Mokreste ea tsebjoang.

<sup>78</sup> Kapa, lilemo tse hlano ho tloha kajeno u ka ba liheleng, hobane u entse khetho e phoso. Lilemo tse hlano ho tloha kajeno mohlomong u tla be u hlatsoa mafiso a likhohlela tameneng. Lilemo tse hlano ho tloha kajeno u ka ba seotsoa seterateng.

<sup>79</sup> Kapa, u ka ba monna kapa mosali e—e leng tlotla sechabeng sefe, ka ho khetha ha hao Kreste. Lilemo tse hlano ho tloha kajeno u ka ba Khanyeng, u kene Hloibilong, hobane u ikhethetse kajeno.

<sup>80</sup> Empa u tlameha ho khetha. 'Me u se shebe seo u se bonang. Khetha seo u se bonang ka tumelo. Ke eona feela ntho e tlang ho sebetsa, ke seo u se khethang ka tumelo.

<sup>81</sup> Lota, o na a tlamehe ho ikhethela. Abrahama file Lota ho ikhethela.

<sup>82</sup> 'Me Molimo o u nea ho ikhethela. "Ikhetheleng kajeno eo le tlang ho mo sebeletsa." Tšimong ea Edene ho ne ho eme sefate sa—sa tsebo, le Sefate sa Bophelo. Motho o filoe monyetla ho khetha sefe seo a se lakatsang. Le kajeno ho a tšoana. U filoe monyetla oa hao, u molokolohi oa khetho, ho khetha sefe seo u se batlang.

<sup>83</sup> Keletso ea ka ho uena, ke ena, se shebe lintho tse u teetseng hare tsa seojaole, le botumo le phatsimo eo u ka e ruang. Empa khetha, ke rialo, ka tumelo, Eo ea tšepisang hobane tsatsi le leng O tla tla a lokise tsohle tse phoso, le ho u nea Bopelo Bosafeleng, le ho u tsosa. Leha u ka khetha tsela ea bakhesuoa ba 'maloa ba Morena, etsa khetho eo. Ha mathata a le haufi, ha mathata a le

naheng, ha mathata a le ka kerekeng, ha mathata a le ka tlung, e ka bang kae, etsa khetho ea hao, "Ka tumelo, ke tla sebeletsa Molimo. Ke tla kokobetsa pelō ea ka pel'a Sefahleho sa Hae. Ke tla khetha tsela ea bana ba Molimo. Ke ba bona ba khesuoe 'me ba lahluee, ba ntšetsoa kantle ba tšehtuo, empa ke tla 'ne ke tiea temeng ea tšebetso ea ka. Ke tla ema hantle ho eona. 'Me ha ba lla, ke tla lla le bona. 'Me nakong ea hlomoho, ke tla hlomoha le bona. Kamoo ba phelang kateng, le 'na ke tla phela joalo."

<sup>84</sup> Joalo ka Naomi ha a boletse... Kapa, Ruthe a boleletse Naomi, "Litsela tsa hao e tla ba litsela tsa ka. Litsela tsa ka e be litsela tsa hao. Moo u phelang teng, ke tla phela teng. Moo u eang teng, ke tla ea teng. Molimo oo u sebeletsang e tla ba Molimo oa ka." Nka khetho eo, leha e ka rutla letlalo la letsoalo la hao, ka ho ikhopola u le motho ea itseng. Ak'o boborane 'me u khethe tsela ea bakhesuoa ba 'maloa ba Morena, 'me u lule ka botšepehi tšimong ea tšebetso le temeng ea mosebetsi.

<sup>85</sup> Lota o ile a qamaka. A re, "Nka khetha." Eaba o sheba nqa Sodoma. A bona linaha tse joang bo bongata ho feta seo Abrahama a se boneng, le moo Abrahama a neng a le teng. O bone monyetla oa ho fulisa makhomo a hae, oa ho ōtla makhomo a nonneng le a hakotseng ho feta.

<sup>86</sup> Kea tšepa ha ke thonke maikutlo a motho. Empa bareri ba bangata ba khethile kemo eo, ho qeka ka Evangel, ba hopotse ho fula chelete e ngata ka hona. [Moena Branham o opa liatla tsa hae hararō—Mong.] Seteketana sa lijo! Nka mpa ka aha naheng e bokèta, ho ja, ho noa metsi a molatsoana, ka ja bohojana bo bobebe, sebakeng sa ho qeka ka likholiseho tsa tumelo ea ka Lentsoeng la Molimo o phelang. Ke tla khetha tsela ea ka.

<sup>87</sup> Ba bang ba bona ba boletse, "Billy, molato oa kopano ea hao, Mapentekosta a mangata haholo ho eona." Moreri e moholo oa bolumeli bo lebitso o itsalo.

Ka re, "Na ebe bolumeli ba hao bo ka e tšehtesa ka chelete?"

<sup>88</sup> Ha se khale haholo, ho makasine oa *Look*, kea kholoa, ho ne ho ngotsoe seratsoana. 'Me mongoli o buile mono, a bua ka batho ba Pentekota. O itse, "Kereke ea Pentekosta ke kereke e holang ka sekhhahla se fetisang lefatšeng kajeno." Hobane'ng? Hobane banna le basali ba lelalitse mahlo a bona 'me ba shebile hole koana.

<sup>89</sup> 'Me mongoli o boetse a thohōletsa batho ba Pentekosta. Oh, ehlide, o boletse, "Ba bang ba hlahaftese, le joalo-joalo. Empa, Methodise e rapela tumeloana. Ba rapela Molimo ka tumeloana. Baptise e etsa hona hoo, le Mapresbeteriene. Empa Pentekosta e rapela ka Bibele ea hae."

<sup>90</sup> Ka tumelo re bona tšepiso. Ke tla ikhetha le bona, ho sa tsotelloe ba nyatsuoa ha kae, ke sa ntse ke le e mong oa bona. Leha ba ka tšehtuo, ka meepa-le-metheo ea bona, joalo ka Iseraele, nke ka batla ho ema le moporofeta oa bohata mosikong

oa leralla, Balaame, le ho leka ho rohaka se hlohonolofalitsoeng ke Molimo. Hobane, Lefika le teiloeng le teng liahelong tseo, Sehlabelo se mali, le Topallo ea Mollo. Ho sa tsotelehe moo ba keneng teng, se ba isa tlholong, 'me ba tlamehile ho e finyella, hobane ke batho ba pallo ba tsamaeang ka tumelo. Leha koana e se bolumeli bo lebitso, e ne e le baphaphathehi, le batho ba Molimo ba joalo. Empa ke batla ho iteanya le bona, ho ikhomahanya le bona lilikeng tsa bona; e seng bolumeling ba bona bo lebitso, empa bolekaneng ba bona ho pota likomelo tsa Moea oa Molimo oa Bosafeleng, etsoe, ka tumelo ke amohetse kolobetso ea Moea o Halalelang. Molimo o nthuse ho fuama maikutlo ao ka mehla.

<sup>91</sup> Lemohang. Hang hoba ba tlohe, re fihlela Lota a bone menyetla ea e—e makhamo a hakotseng. Bongata bo bona menyetla ea bukanapokotho e nonneng. Bongata bo bona menyetla ea kemo e ntle tikolohong. O bone likhonahalo tsa phaello ea didolara tse 'maloa. O bone likhonahalo tsa ho hlomamisoa ramotse. Ka ho ba moeti, le monna ea bohlajana haholo, ka mokhoa oa hae, "Nka beoa hlooho ea motse." O bone likhonahalo ka ha li ne li robetse ka pel'a hae. Empa o sitiloe ho bona mollo o tlang ho timetsa naha. O sitiloe ho ikeletsa, khahlano le lefatše le lusang sebe, le hoba Molimo o ne o tlameha ho le timetsa.

<sup>92</sup> 'Me, kajeno, ba leka ho ikeletsa ka ho re, "Na ha u . . . ?"

Ke tla re, "Na u Mokreste?"

<sup>93</sup> Ba re, "Ke mo-Amerika." Ha e amane le eona sa lekhoaba le ka lekang ho ipitsa senqaqane. Ha e amane le eona ka letho. [Moena Branham o opa liatla hang—Mohl.]

<sup>94</sup> Le tlil'o timetsoa, hoba Molimo ke oa toka. 'Me ha Amerika e ka phema libe tsa eona, Molimo oa ho loka le o ikemetseng, le o halalelang o tlamehile maoto le matsoho ho—ho tsosa Sodoma le Gomora a sokolohe ho ba chesa lore, ka baka la sebe sa bona; haeba A re lumella ho e phema.

<sup>95</sup> Haeba A u lumella ho kena Leholimōng ka mesebetsi ea hao e sa lokang, O tlamehile maoto le matsoho ho tsosa Ananiase le Safira ho ba fa monyetla o mong. Ruri O ne a tla etsa joalo. Empa O na le toka. Ananiase o bone chelete ea hae. Petrose o bone Kreste.

<sup>96</sup> Oh, banna! Lota ha a bona tšenyeho ea bana ba hae tulong eo.

<sup>97</sup> Bongata ba lōna, kajeno, le tiiselitse litumeloana tse hoammeng tsena le lintho, ha le bone ho fetella ha bana le tšenyeho ea bana ba lōna. Ha u bone morali oa hao a le ka tlung ea bootsoa. Ha u bone mora oa hao e le letaho, kapa a lutse tafoleng ea likarete nqa e 'ngoe.

<sup>98</sup> “Hobane e nosetsehile hamonate.” ’Me ha ho buuoe ka sebe. Ha a bona mohatsa’e, hloooho ea disosaiti tsohle, a fetoloa tšiea ea letsoai, mohla a shebileng. Ha a ipona a phonyoha ka lesoba la nalete feela, a balehela motsaneng nqa e ’ngoe, ho baballa bophelo ba hae. Ha a bona seo, ka hobane a ne a shebile se ka pel’ a hae feela.

<sup>99</sup> Empa, Abrahama, ha a bona makhulo a nosetsehileng, hoba a phahamisa mahlo a hae ’me o bone hosasane, moo e tla ba mojalefa oa lintho tsohle. Mokreste oa makoma kajeno o phahamisa mahlo a hae ’me o bona tšepiso ea Kreste: “Ho lehlohonolo ba bonolo ba tla ja lefa la lintho tsohle. Ba tla ja lefa la lefatše.” Mokreste oa makoma, ka tumelo, o a shalima ’me o bona seo. ’Mitseng seo le se batlang. O lelalitse mahlo a hae. ’Me hoba a etse joalo, Molimo o itse, “Abrahama, haola le naha, ke ea hao kaofela.” Ka tumelo, Abrahama o entse sena; ka eona tumelo eo Moshe a neng a e ruile.

<sup>100</sup> Ho ngoliloe ke sengoli, se buileng tjena. Ke ile ka hopola e le mantsoe a mathemaloli ho fetisa. Ha thoe Abra- . . . “Moshe o nkile makhabane a tlokomanang a lefatše a a lekanya sekaleng; le bobo boselesele ba borapeli, a bo lekanya sekaleng se sele; eaba bobo boselesele ba borapeli bo liha sekala ho feta bokhabane bo tlokomanang ba lefatše.”

<sup>101</sup> Ho a tšoana le kajeno, haeba re batla ho bitsolloa letho re batla ho reoa, “mahlanya,” kapa “baphekoli ba Halalelang,” kapa “mohalaleli-mothethehi,” kapa seo ba batlang ho se reella. Bobe ba rōna bo tlolisang bo tla liha sekala ho feta makhabane a tlokomanang ao lefatše le ka a ruang. Ba batla ho bitsoa “sekhale-khale, moholi o rothofetseng, sehlakana-hloooho.” Seo se liha sekala ho feta bokhabane bofe boo diabolosi a ka u tekelang bona. Ruri bo tla etsa joalo.

<sup>102</sup> Moshe o ananetse sekhobo sa Kreste. O bonetse Kreste pele. Hamorao o buile mantsoe a susumetsang ka Eèna. “Lea bona, Morena Molimo oa lōna o tla le hlahisetsa moporofeta ea joalo ka ’na.” O tsebile. O ’Monetse pele, ’me a lekanya sekhobo sa Hae e le matlotlo a fetisang phatsimo eohle ea lefatše.

<sup>103</sup> Motsoalle oa Mokreste, kajeno, na u ke ke ua etsa joalo? ’Me phatsimo eohle ea lefatše le botumo ba lefatše, ka tumelo, re bona Ea tšepisitseng. ’Me bobo bo fetisang ka kereke kajeno, maemong ’ohle a eona, koana boima ba eona bo phala sohle seo diabolosi a ka u tekelang sona. Leha re harotsoe, leha re robile likotoana, leha re ferekane re pshatthehile, bohlanyeng ba melingoana ea bolumeli, boima ba eona bo tla phahamela nyee efe eo diabolosi a ka u behelang eona. Ruri.

<sup>104</sup> O balile sekhobo sa Kreste e le letlotlo le fetisang menono eohle ea Egepeta. Eaba o tlameha ho etsa ho hong. A tèla Egepeta. Oh, ke rata lentsoe leo. A tèla Egepeta. Lea bona, a shebile ka fesetere e le ’ngoe, feela chalimo ea hae e fapanle

ea Faro. Ho ka thoeng holane Faro a bone pheletso ea hae? Ho ka holane Faro a bone sechaba sa hae se noela metsing? Moshe o e bone. Joang? Ka saense? Ka tumelo, Moshe o e bone. O entse tsohle ka tumelo, hobane Molimo o na be a tšepisitse Abrahama, ntata'e, ha thoe O tla—O tla etela sechaba sena hoba ho fete lilemo tse makholo a mane, le ho ba lokolla. 'Me ka tumelo, Moshe o lumetse Lentsoe leo Molimo o le boletseng, 'me o tsebile, ka tumelo, e le moetapele ea khethetsoeng ho ba ntša. A tseba moo a emeng teng. A khetha litulo tsa mekoting ea seretse, e le molubi oa seretse, 'me a bala sekhozo sa Kreste e le matlotlo a fetisang ho lula teroneng ea Egepeta. A ikhethela... A se ke a re, "Ke tla e utloela bohloko." A nka lehlakore la bona 'me a tsamaea le bona! Khanya ho... A nka sebaka sa bona. Ho tsamaea le bona.

<sup>105</sup> Ha ho makatse ha mongoli ea bululetsoeng a boletse:

Ke ketha ho ema le bakhesuoza ba 'maloa ba  
Morena.  
Ke qalile ka Jesu, joale kea tšela.  
Ke leetong la lefatše la Kanana. (Ehlile.)

<sup>106</sup> Moshe. E mong o boletse Moshe a ka mpa, sebakeng sa ho beoa mora oa Faro le ho rua mabenyan a lefatše, a mpa a khetha ho beoa mora oa Abrahama sebakeng sa ho beoa mora oa Faro. Mora oa Abrahama, ea nyatsuoang, sebakeng sa mora oa Faro, khosi.

<sup>107</sup> Nka mpa ka beoa mora oa Morena Jesu, le mosebeletsi-'moho oa Hae, 'me ka ema le batho ba khesuoang ba lefatše lena, sebakeng sa Mopresidente oa United States ea Amerika e khôlô ena, kapa ho ba Elvis Presley, kapa Pat Boone, kapa seo u se batlang. Ke tla khetha tsela eo.

<sup>108</sup> Maleiti a macha a tlameha ho khetha tsela ea bona. Sebakeng sa ho fetoha e—e Mary Pickford, kapa khalala e itseng ea dimovi, kapa ngoanana ea tsebjoang, ikhethele tsela ea bakhesuoza ba 'maloa ba Morena.

<sup>109</sup> Nka mpa ka ba moreri sefaleng, ho rera menono e sa fihlelloeng ea Kreste, ho fetisa khalala ea dimovi ea Hollywood, kapa motho ea phahameng ho fetisa lefatšeng. Leha nka tšoanelia ho ja naha e mokëta, ho ba mokopi, kapa sohle seo ke tlamehang ho se etsa, ke tla khetha lehlakore la batho ba Morena. Ka tumelo, ke etsa hoo. Ke filoe monyetla. Empa, ka mohu oa Molimo, ke sa ntse ke bona ka tumelo.

Ka tumelo ke e bonela hole;  
'Me 'Ntata rôna o eme tseleng,  
Ho re lokisetza bolulo Teng.

<sup>110</sup> Molekhetho o boletse, letsatsi le leng, "Hobaneng u fetotse kereke eo lehae la hao? Ua susumetsoa ke'ng ho nehela didolara tse likete tse mashome a mabeli a metso e mehlano kerekanaeng eo ea khale ea tabernakele e kang thotobolo?"

<sup>111</sup> Ka re, “E ne e se ka baka la kereke. Ke batho ba leng mono.” Ha ke rua letho la lintho tsa lefatše lena. Peni efe eo nkileng ka e phutha e abeloa kereke ena. Hobane’ng? Tumelo ea ka e ho Molimo, ’me e seng linthong tsa lefatše lena. Ke thahasella tse holimo. ’Me ke kholoa le lōna le tšoana, haeba le lokile nqa Molimo. Ke ’nete, hore le joalo. Rōna, ka tumelo, re a amohela. Rōna, ka tumelo, re lumela Molimo.

<sup>112</sup> Moshe, o ne a lokele ho khetha. ’Me a tlameha joalo, hoba a khethe, a tlameha ho loana tumelo, ka hona, hoba ha a ka tšaba khalefo ea khosi. Joale, ka botho, o ne a tlameha ho tšaba khalefo. A e-na le tokelo ea ho tšaba khalefo ea khosi, empa ha a etsa joalo. Ha a etsa joalo, hobane o na tlameha ho etsa mosebetsi, ’me o ne a kene tseleng ea kutlo. ’Me ha a tsotella seo khosi a se buileng ka eona. A khetha tsela ea Hae ka ho tšoana.

<sup>113</sup> Joale, Faro, ehlide, hoba a bone a fentsoe, a batla ho nea Moshe le bana... O itse, “Ho lokile, ke tla u bolella seo ke ea se etsa. U tla aha lefatšeng u ntano tsoa ho ea etsetsa Molimo oa hao sehlabelo.”

<sup>114</sup> Diabolosi o sebetsa joalo. “Oh, u ka ba morapeli. Hore’ng u sa tlohe ho ingolisa le kereke ea mofuta? Ha u a tlameha ho fumana lintho tsena tsohle.” Monna o re ho mohatsa’e... .

<sup>115</sup> Mohatsa’e o re, “Monna me, ke pholositsoe. Ha ho sa batloa ferefef, kapa ferefef ea molomo le nyee. Ha ho sa batloa sena. Ha ho sa batloa meketjana. Ha ho sa batloa letho la disosaiti tsena. ’Na ke tsoile ho eona! Nako ea ka ke tla e khethela ho bala Lentsoe, ho hlokomela lelpa.”

<sup>116</sup> “Joale, sheba, moratuo. Uena, u ka ba morapeli, ho lokile. Joale, sheba, u—u ka ea ka *mona*. U fumane kereke e phoso.”

<sup>117</sup> Che, ha ho joalo. U ka har’ a e nèpileng. Ha u fumana moreri a u rerela eona, u tlameha ho e tiisetra. Batlisisa morao har’ a Mangolo ho fumana haeba e lokile.

<sup>118</sup> “Oh,” ho thoe, “fetela ka *mona*. Mona ha ba—ha ba hatelloe ho etsa joalo. Lea bona? Ha ba etse sena mona.” Ho joalo ha... . “Tsamaea hakana feela.” Empa ha a batle ha u tsoa naheng. Ke diabolosi ea sebetsang joalo. Ha a batle ha u itosolla linthong tsa lefatše; hoo ke ho qhanha lefatše le kereke ’moho feela.

<sup>119</sup> Tsatsi le leng, ha ke theoha ka tsela, ka bulela radio ea ka. ’Me ha binoa e—e sefela, ka ’na ka mamela, ’me ka tlameha ho mamela, nka rialo, sefela ka bottlalo, pele nka rera haeba e le sefela sa borapeli ka ’nete, kapa na ebe diabolosi o leka ho khethula lintho tsa Molimo a li theolela boemong ba lefatše. U ke ke ua etsa joalo! Molimo a hauhele!

<sup>120</sup> Ha ke tsotelle na Elvis Presley o ngola dialbamo tse kae, tsa lifela tsohle tse monate tsa borapeli. O sa ntse a arubelitsoe ke diabolosi. O isa bana ba bangata liheleng, hara litsamaiso tsohle tse o ke li tsebang, lefatšeng lohle letsatsing lena. Pat Boone le

ba bang bohole, e ne e le setho sa church of Christ; 'me Elvis Presley, ke Mopentekosta; ke Judase Iskariota, ka sebopeho sa banna bao. Diabolosi o leka ho tšoara lintho tse phahameng tsa Molimo, ba tle ba li tsoakanye tlase *mona*. Batho ha ba batle ho lelala Holimo, *Sena*. Ba sheba *mona* feela, ho thoe, "Be, tsohle li a itšoanel." Ha li tšoane. Tsoa lefatšeng leo.

<sup>121</sup> Ha thoe, "U ka nka leeto la matsatsi a 'maloa. 'Me oa tloha, oa 'na oa ahèlla lefatšeng." Ehlide, o ba tsebile ba tla boea. Eaba o e fumana e sa tl'o sebetsa, a nahana ho hong. A re, "Ke tla u bolella seo u ea se etsa. U ka ea hohle moo u batlang, feela le siee basali ba lōna bohole, bana ba lōna bohole, le makhomomo a lōna 'ohle, morao *mona*. Le li siee mona, 'me lōna le ka itsoela." Hoba, o ba tsebile ba ruile maruo morao mono, a tlang ho ba khutlisa.

<sup>122</sup> 'Me diabolosi o rialo ho uena. Ha u ka lesa lintho tse itseng tsa lefatše li leketlile ho uena, u sa batla ho tsuba, u batla ho noa, u batla ho apara selefatše, diabolosi o e batla hantle hakaalo.

<sup>123</sup> Ke utloa khafetsa ka ho oa mohaung. Ha ke kholoe batho ba oa mohaung hakaale ka ha ba hopola. Ba mpa ba siea maruo a mangata Egepeta a ba hulelang morao, ke phetho. Ho oa mohaung ha se seo ba se nahantan. U sile lefatše le le ngata morao mono, le u hulela teng.

<sup>124</sup> Moena, kea u bolella, mohla Iseraele a ne a lokile, ka khitla ea bosiu, ke ha ba tšoere sohle seo ba se hlokang lefatšeng lena, ba phuthile 'me ba loketse ho falla.

<sup>125</sup> Molimo re romelle tsoseletso e joalo. Re phahlela tsohle, 'me re itokisetsa ho tsamaea. Mohoo oa khitla ea bosiu o a tla, "Tsoang le Mo khahlanyetse." Le mpe le phahlele tsohle 'me li tlangoe. Le se ke la tšoara letho, lefatše lena, ho u ngoka le u khutlisa, likhole life tse u hulelang fatše. Tlama u phuthe. Ha re itokiseng. Re a falla.

<sup>126</sup> 'Me lea tseba ke'ng? Ke tla le bolella, ba ne ba tšepahetse hakaale ho Molimo, ho fihlela Faro a roaleha ka khitla ea bosiu, o itse, "Tsoang! Tsoang, le tsamaee. Nkang thepa ea lōna eohle, le tsamaee!"

<sup>127</sup> Ke thabetse monna ea ka phelang hautšoane le Molimo, ho fihlela diabolosi a sa tsebe a mo etse'ng. Ke hantle. Tsoa! Tloha mona! Mamela Molimo!

<sup>128</sup> Ka tumelo, o bone tšepiso. Molubi oa seretse, kapa e se molubi oa seretse, o ne a khethile tsela ea bakhesuo ba 'maloa ba Morena. Faro o itse, "Nkang ling tsohle tsa lōna le tsoe mona! Ha ke tsebe ke etse'ng ka lōna." A tšepahetse hakaale ho Molimo, ka tumelo.

<sup>129</sup> Tumelo e sebetsa mehlolo, ha u lula u tšepahetse ho Molimo. Ka tumelo, rea 'Mona.

Nako ea rōna e felile; re tlotse nako.

<sup>130</sup> Empa, ka tumelo, hoseng hona, phahamisa mahlo a hao. Se shebe se u likileng, lefatše lena la joale, empa sheba u bone Eo Ea tsepisitseng. Bibele e itse, "Hona joale ha re bone lintho tsohle li phethehile, re mpa re bona Jesu." Sheba ho Eèna, hoseng hona, 'me litsela tsa hao li tla fetoha.

<sup>131</sup> Re sa inamisa lihlooho tsa röna, nakoana feela, lentsoeng la thapelo. Morena a ekeletse Molaetsa mahlohonolo a Hae.

<sup>132</sup> Nahana pelōng ea hao joale. Na e sa le u shebile lintho tsa lefatše? Ka tumelo, na u bona Jesu? Na u shebile botumo ba hao, kereke ea hao? Seriti sa hao bathong ba lefatše ke efe? Kapa, na u bona Jesu Eo, ka khauho, A ipeileng letsohong le letona la Boholo bo Holimo, Ea utloileng bohloko ba moshoelatumelo, ea lokileng bakeng sa ba sa lokang? Na u ka phahamisa matsoho a hao ua bona Sefate seo sa Bophelo koana? Ka hona, tlohela sefate sena sa saense ea mahlale le tsebo, 'me u Mo sebeletse.

<sup>133</sup> Na u ka rata ho hopoloa thapelong pele ke rapela? Phahamisa letsoho la hao, ka qelo eo u ka e hlokang. Molimo a le hlohonolofatse bohle. O bona letsoho la hao.

<sup>134</sup> Ha u le moetsalibe, phahamisa mahlo a hao 'me u shebe joale. Ha u bile monyemo, ha u ile ua ithara ka likhang le ka linthoana, li etsa phapang efe? U tlil'o shoa le leng la matsatsi ana. Letsatsing lefe? È ka ba kajeno! Ha u tsebe. Hora ho tloha joale, u ka ba liheleng, kapa u ka ba Leholumöng. Empa joale u tlameha ho khetha. Ha ntho e sa lokang e le teng bophelong ba hao, ketha joale, ka tumelo.

<sup>135</sup> U re, "Be, ha nka iphetetsa ho eèna feela! Ha nka iphetetsa ho eèna!" Ho sa tsottelehe seo ba se entseng, khetha Bophelo. Khetha Bophelo.

<sup>136</sup> Hoba, Jesu o itse, "E ka re ha le sa tšoarele motho molato oa hae, le Ntata löna ea Maholimöng ha a le tšoarele." Ka hona u atamele hakaalo feela. Ha u na le taba pelōng ea hao khahlano le motho ofe, moetsalibe kapa mohalaleli, u kotsing ea mollo oa lihele.

<sup>137</sup> Joale phahamisa leihlo la hao. U bona'ng, sera sa hao? Kapa, u bona 'Moloki oa hao? U shebile'ng hoseng hona?

<sup>138</sup> Ha u kula, 'me ngaka ea hao e re u ke ke ua fola, phahamisetsa leihlo la hao, sefapanong, moo A tetekiloeng ka baka la litlolo tsa röna, re folisitsoe ka metopa ea Hae. U se shebe seo ngaka e se buang; o sebetsa ka mahlale. Tumelo e sebetsa selikeng sa Moea le Molimo. Ha re nahaneng lintho tsena joale le sa phahamisitse matsoho a löna. Molimo o a bone.

Ha re rapeleng.

<sup>139</sup> Oho Molimo Rabosafeleng, ka khutso ea thoriso ena joale, ka mora Molaetsa o tsuileng, se lumelle lipeō tseo tsa Lentsoe la Hao, Morena, ho oela mobung o majoe. Se lumelle Molaetsa, Morena, ho oela meutloeng, litsheleng, hoo lipelaelo tsa bophelo

bona (joalo ka Lota) li ka e pupetsang, qetellong, ea lahleloa ka ntle. Empa, oho Molimo o bokoang, e lumelle ho oela ho o motle, mobung o nonneng, lipelōng tse inyatsang. 'Me le holim'a ea ka, hape, Morena, bohole re tle re shebe ka seipone sa Molimo sa ho sheba, le ho bona Kereke ea Morena Jesu e khesoang, batho ba khesoang, tsela e khesoang, re tle re tsamaee tseleng e khanyang ena.

<sup>140</sup> Joalo ka Moshe, ha a tsebang moo a habileng teng. Le batho ha ba tseba moo ba eang teng. Ha ba tseba ba tobe nqa efe. Ba mpa ba qala feela.

<sup>141</sup> 'Me, oho Morena Molimo, sefela se monate sena se sa letsoa, ka tumelo re boneka Lefatše leo hole koana. Hona joale, banna le basali ka mona ba se nahane seo lefatše le tlāng ho se bua, kapa ka moo ba tsamaeang kateng. Ba tsohe moeeng oa bona feela, 'me ba tlohe.

<sup>142</sup> Moshe o latetse Leseli, 'me Le mo isitse lefatšeng la pallo. A sa tsebe moo a eang teng, a mpa a tsamaea Leseling, ho ea lefatšeng leo le monate-nate.

<sup>143</sup> Aba sena, Morena, kajeno, ba bangata mona ba tle ba tsamaee Leseling la Lengolo le setsoalle sa Moea o Halalelang, le 'moho le Kereke; eona Kereke, Letsibolo, masea a sa tsoa tsoaloa a amohetseng Kreste, 'me a tlatsitsoe ka Moea o Halalelang, ho tsamaisoaa ke Moea. Re ke re tsamaee setsoalleng sena, 'moho, re potile likomelo tsa Molimo, ho Mo sebeletsa ka kolobetso, kutlong ea lefu la Hae, kepeloo, le tsoho. Re ke re Mo sebeletsa ka taelo ea Hae, "Emang Jerusalema le tle le be le tlatsoe ka Matla a tsoang Holimō." Re Mo sebeletsa ka pholiso ea Khalalelo, ka ho rapella bakuli. Re Mo sebeletsa ka selallo, ho ngoatha bohobe, ka pelō e le 'ngoe, ka setsoalle ho pota Lentsoe la Molimo. Re Mo sebeletsa ka litaelo tsohle tsa Hae tse Khethhehileng, ho fihlela Lefatše le hlaha pontšeng. Aba sena, Morena. Utloa thapelo ea rōna, re e laeletsa Uena eohle joale, ka Lebitso la Morena Jesu.

<sup>144</sup> Joale ka lihlooho tsa rōna tse inamisitsoeng, ka khutso, butle, ha re bineng sefela sena. Joale ena ke thoriso. Molaetsa o felile. Ho se be motho ea tsamaeang. Le khutse feela. Ha re roriseng.

<sup>145</sup> Molaetsa ke ho lokisa. Nahanisisa seo u se entseng joale, seo u tlamehileng u be u se entse, se u entseng seo u leng sona kajeno. U ahlotsoe ke'ng, kajeno, kahobane u entse ntho maobane. E tla ba eng hosane? E lokise kajeno, 'me hosane u tla be u lokolotsoe. Lea bona? U tšoanelo ho khetha. U ka e etsa joang? "Ka tumelo, joale ke tēla tsohle. Joale kea tēla, 'me tsatsi le leng ke ea Koo."

Koana monateng, monateng,  
Re se re tla kopana beau- . . .

Rorisa Morena feela moeeng oa hao joale.

Koana monateng, monateng,  
Re tla kopana le Kereke e khesoang eo. (Ho  
boima, feela re tla kopana tsatsi le leng.)

Ho Ntata rōna ea mosa holimo,  
Re tla isa thoriso tsa rōna,  
Ka neo ea lerato la Hae,  
'Me maseho a tla halaletsa....

'Moho le bakhesuoa ba 'maloa ba Morena, ka tumelo, kea khetha.

Koana monateng (monateng) koana...  
(monateng koana)

Re tla kopana 'libohong le letle lela; (monateng  
koana)

Koana monateng (monateng) monateng koana,  
Re tla kopana 'bopong le letle lela.

Le teng Lefatše le...

Mo roriseng feela. Ena ke thoriso.

...kea bona,

Ke etsa khetho ea ka tumelo.

Oh, teng Ntate o letile...

<sup>146</sup> Ke bona bohole ba Morena Koana; Moena George, Moena Seward, bahalaleli bohole.

...bolulo Teng. (E, Morena!)

Hona monateng...

<sup>147</sup> Ntate oa hae, Howard, Edward, metsoalle ea khale eohle e halalelang e ileng ea khetha Tsela eo, morao koana, khale koana nako e fetileng.

Koana monateng (E, Morena!) koana  
monateng (koana monateng),  
Re tla kopana 'bopong le letle lela.

Re tla bina hona teng beau-... (Oho Molimo!)  
Lithoko tse monate tsa bakhethoa, (Khanya ho  
Molimo!)

...sa tla hlomōha hape,  
Ha ho mefehelo Phomolong eo.

Koana monateng, monateng koana... (koana  
monateng)

Re se re tla kopana koana beau-...



*KA TUMELO, MOSHE* SST58-0720M  
(By Faith, Moses)

Molaetsa wona, ka Moena William Marrion Branham, o rerilwe sethatong ka Senyesemane a Sontaha hoseng, Phupu 20, 1958, Branham Tabernacle, Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2017 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)